

REGIONAL NEWS

HEADLINES:-

1. Mizoram Chief Election Officer, Madhup Vyas-a'n Lok Sabha inthlan neih chhoh mek leh thla thar ni 19-a vote thlak turah inthlan muanawm leh felfai a awm theih nana thawhpuiah Mizoram mipuite a sawm.
2. Mizoram Journalists' Assn. (MJA) chuan vawiin khan Aizawlah Gen. Conf. neiin kum hnih lo awm tura an pawl hruaitu tur an thlang.
3. Election Commission chuan state leh UT tina Chief Electoral Officer te chu khawlum zual zel thlir chung a hma la turin a thurawn a pe.
4. External Affairs Minister Dr. S. Jaishankar chuan nimin khan Singapore Prime Minister Lee Hsien Loong a kawm.

<><><>

CEO MADHUP VYAAS

Mizoram Chief Election Officer (CEO) Madhup Vyas-a'n Lok Sabha inthlan neih chhoh mek leh thla thar ni 19-a vote thlak turah inthlan muanawm leh felfai a awm theih nana thawhpuiah Mizoram mipuite a sawm.

CEO hi vawiin khan a office-ah Akashvani Aizawl Regional News Unit chuan a kawm a. Pu Madhup Vyas-a chuan MP inthlan vote thlak ni chu thla thar ni 19 a nih thu sawi nawnin inthlan chuh tuma hming pe lutte inhnuhdawh hun atan tun thla ni 30 thleng hun hawn a ni a, June ni 4-ah vote chhiar a ni ang, a ti a. Lok Sabha inthkanpuiah hian Mizoramah voter nei mi Nuai 8 Sing 6 Sang 1 leh 277 an awm mek a, chung zinga Sing 4 Sang 1 leh 477 chu mipa an ni a; hmeichhe voter Sing 4 Sang1 leh 520 an awm bawk a, District 11-ah polling station 1,276 a awm mek bawk.

Kumin MP inthlanpui atang hian EVM/VVPAT model thar ber M3 chu hman tan a ni dawn a. ECI chuan VVPAT leh EVM thahnem tak a rawn dah tawh a. First Level Checking (FLC) neih tawh niin chung zingah chuan Ballot Unit 2,158, Control Unit 2,195 leh Voter Verifiable Paper Audit Trail (VVPAT) 2,228 te chu vote thlak huna hman theih mai turin District tinah venhimna khauh tak hnuaiah a awm vek tawh a ni.

Tun thla ni 16 atang khan Model Code of Conduct chu Mizoram ah hman tan a nih thu te, hemi dan pela kal lui te chu dan hmanga hrem theih a nih thu te, Model Code of Conduct hman tan anih atang hian party candidate, party hrang hrang bakah sorkar hnathawkte chu danin a huam chin baka che lo turin CEO chuan a ngen a ni.

CEO Pu Madhup Vyas-a'n inthlan kaihnhawiha thu a sawi hi Akashvani Aizawl chuan zanin dar 7 leh Minute 5-ah a pe chhuak dawn a ni.

<><><>

SEMINAR ON MEDIA, LAW AND ETHICS

Mizoram State Legal Services Authority, Govt. Mizoram Law College leh Govt. Aizawl North College-te tangho chuan vawiin khan Gauhati High Court, Aizawl Bench Conference Hall-ah Seminar on Media, Law and Ethics an huaihawt a. MSLSA Executive Chairman, Gauhati High Court Judge, Justice Michael Zothankhuma'n a hmanpui a. He hunah hian chanchinbumite, Law Professional, Youtuber te leh sawm bik te an tel.

Justice Michael Zothankhuma chuan seminar-a thupui hrang hrangte inkaihnhawih dan sawiin, Ethics chu mahni chhungril lam nun vawngtu tur atana dan siam, mihring nunho nan leh ni tin mimal nuna tih tur mawi leh tha zawk

duan hi a ni a, Law ve thung erawh chu pawn lama mi vawngtu, khawtlang inrelbawlina kawnga tih tur leh tih lo tur mumal tak siam hi a nih thu a sawi. Media chuan chanvo pawimawh tak an chelh thu pawh sawiin, tunlai chhanah chuan law leh ethics khaikawptu, mipuite puitu tur, aw neilote tana aw siamsaktu an nih avangin thu dik leh hleih nei lo pe chhuak a, dan nena thudik pekchhuah kawnga tan kawp tlat a tul thu a sawi a ni.

He hunah hian Akashvani Aizawl, RNU-a Copy Editor Pi Irene Lalruatkimi, leh mi thiam dangte'n thu pawimawh hrang hrang sawiin an zirtir a ni.

<><><>

AIZAWL CITY BUS FARE

State Transport Authority-in man chawia mipui phur lirthei chuan man a siam thar angin vawiin atang khan Aizawl City Bus te chu chuan man bithliah thar angin an tlan tan.

State Transport Authority-in Aizawl City Bus chuan man a bithliah thar dan chuan stand khatah Cheng 8 a ni a, stand hnih thleng Cheng 10; stand 3 thleng Cheng 12; stand 4-ah Cheng 15; stand 5 leh stand 6-ah Cheng 18; stand 10 thleng chuan man Cheng 20 a ni.

City Bus bakah hian STA chuan tun hnai khan thuchhuah siamin kumin February thla ni 19-a STA thukhawmin a rel angin, man chawia mipui phur lirthei service - Taxi, Autorickshaw leh Maxicab te chuan man pawh a bithliah thar a ni.

<><><>

MJA GENERAL CONFERENCE

Mizoram Journalists' Association (MJA) General Conference vawi 50-na chu vawiin khan Aizawl Information & Public Relations (I&PR) office building-a Lianchhiari Run-ah hman a ni.

He hun hmanpitu I&PR Addl. Secretary Pi Betsy Zothanpari Sailo chuan chanchinbumite chu mipuite thu thar hriatna hnar ber leh mipui suktlek kaihruai theitu an nih avangin an hna a pawimawh em em a, tan bik nei loa lai taka thawh leh chhui zuia chhuih zui ngai lam chanchin thar ngaihven peih turin a chah a. Thuchhuah turah fimkhur a ngai hle a, mahni hamthatna um ringawt lova mahni hna ngai pawimawh reng tur te, fimkhur leh uluk taka thu chhuah thin turin a chah a. Hnamdang te hmuh theiha Mizoram hmel mawina pho lang tam tur leh state chhunga sawrkar hmalakna te pho lang tam turin a chah bawk. MJA President Pu C. Lalrambuatsaiha chuan MJA inzawmkhawmna a ngheh zual theih nan intlawhchhuah a pawimawh a; tun dinhmunah sum lama harsatna a awm rih avangin harsa rih mah se sawrkar bel chungin hmalakna kalpui mek a ni, a ti.

MJA General Conference hi hun thumah thenin Hun khatna hman zawh hian kum hnih chhunga MJA hruaitu thar thlan a ni a. President atan President tang lai Pu C. Lalrambuatsaiha thlan nawn a ni a, Vice President-ah chuhtu awm lovin Pu C. Lalhmachhuana tlinga puan a ni a, Treasurer-ah General Secy tang lai Pu Lalrinmawia Sailo thlan a ni a; Executive Member mi 11 thlang chhuak bawkin, an zing atang hian President-in a thawhpui tur Secy. hrang hrang ruat ang.

Mizoram pumah MJA member 192 an awm mek a. Aizawlah 91 awmin Lungleiah member 20 an awm a. Siahaah 12 awmin Champhaiah 17 an awm a. Kolasib-ah 14, Serchhipah 14, Lawngtlaiah 10, Mamitah 8 leh Hnahthialah member 6 an awm a. I&PR Department in Mizoram Press Accreditation list-a siamah Accredited Journalist mi 142 an awm mek.

<><><>

LS ELECTIONEERING

Rorel lai Zoram People's Movement (ZPM) party chuan thla thar April ni 1 atangin Lok Sabha inthlan campaign beihpui an thlak dawn.

ZPM chuan nimin khan thuchhuah siamin Campaign hi Aizawl Vanapa Hall-ah an tan dawn tih an sawi a. Chief Minister Pu Lalduhoma chuan he hunah hian thu a sawi ang a, President Pu Lalliansawta bakah party hruaitu lian dangte he hunah hian an tel ang.

Indian National Congress pawhin naktip atangin Campaign beihpui an thlak tan dawn a, state chhunga eptu party lian ber Mizo National Front (MNF) leh BJP hruaitute chuan campaign bul an tan tawh tih an sawi.

April ni 19-a Mizoram Lok Sabha bial inthlan vote thlak turah candidate 6-in an chuh dawn tih a chiang tawh a, mi 5 hi political party-in an dintir an ni a, 1 chu independent a ni.

Mizorama Lok Sabha inthlanah hian Congress party chu vawi 6 a chak tawh a, MNF vawi 2 chak tawhin kum 2017-a din ZPM chuan a vawi khatna atan party malin Lok Sabha inthlanah hian an ding dawn a, ZPM hian kum 2019 khan Congress nen candidate intawm an lo nei tawh a ni.

Kum 2019 Lok Sabha inthlanah khan MNF party chuan vote awm zawng zawng atangin zaa 44.89 a hmu a, ZPM leh Congress tangdunin dawtin zaa 43.26 an hmu a, BJP in zaa 5.75 percent hmu in People's Representation for Identity and Status of Mizoram (PRISM) chuan zaa 2.67 per cent an hmu a, 2.94 per cent chu independent candidate pahnih ten an hmu bawk a ni.

Lok Sabha inthlanah hian Mizoramah chuan April ni 19-ah vote thlak a ni dawn a. State pumpuiah vote nei mi Nuai 8 Sing 6 Sang 1 leh 277 an awm a, hmeichhe voter Nuai 4 Sing 4 Sang 1 leh 520 an awm a, mipa voter Nuai 4 Sing 1 Sang 4 leh 777 an awm bawk.

<><><>

LUNGLEI – POLLING PARTY 1ST RANDOMIZATION

Lok Sabha inthlan vote thlak ni-a duty turte Duty-na tur hmun siam rem thawh khatna chu vawiin khan Lunglei District Election Officer, DC Pi Ramdinliani kaihruiin a Office-ah neih a ni a, hetah hian polling party te chu Assembly bial 6-ah sem darh an ni a, an duty-na tur polling station leh tul dang siam rem turin tum hnih dang thutkhawm leh a ni ang.

Lunglei Dist-ah hian Pink polling official te tiam lovin mipa hlang Presiding Officer (PRO) 188; Asst. Presiding Officer (APRO) -188 leh Polling Officer (PO) 279 an awm a. Polling Station 176 awmah hmeichhe hlangin an vil tur Pink Polling station 24 a awm a. Polling Party-ah hian Mipa reserved polling official zaa 20 an awm a, Pink PS tana reserved polling official zaa 30 a awm bawk.

<><><>

KOLASIB DEO & BANK OFFICIALS

Lok Sabha inthlanpui neih chhoh meka Candidate-te leh Political Party hrang hrangte senso vil dan tur chungchangah Kolasib District Election Officer (DEO), DC Pu LT Sanga chuan vawiin khan Bank hrang hrang hotute a kawm.

DEO chuan Election Commission of India (ECI)-in inthlan hun leh ni tur a puan atang khan Election Model Code of Conduct hman tan nghal a nih thu sawiin, inthlanna felfai, langtlang leh thianghlim a awm theih nan inkaihhruaina hrang hrang zawm a tul, a ti a. Inthlan kaihnawihha Candidate-te Campaign senso vil kawngah Bank-a thawkte an pawimawh hle a ni, a ti.

DEO bakah hian Election Officer, Pi Christina Lalmuanzuali chuan District tinah Political party ten Additional Expenditure Agent an ruat a tul thu leh ECI-in

Candidate-te campaign senso a bithliah chin pel lo tura vil leh enpui a ngaih thu a sawi a. Hemi kawngah hian Bank-a thawkte nen thawhho a pawimawh avangin inthlang tura inbuatsaihna kalpui chhunga report hrang hrang pek ngaite ngai pawimawh turin kalkhawmte a ngen bawk a ni.

Kolasib DIPRO Pu Hmingthanzuala chuan mipuiin vote thlak an ngaih pawimawh theih nan ECI thuchhuak angin Systemic Voters Education & Electoral Participation (SVEEP) kalpui a nih thu sawiin Bank-te nen tangkawpa Financial Literacy Campaign an kalpui thinnaah Voter Awareness nen a kal kawp theih dan turte sawiho a ni.

<><><>

EXTERNAL AFFAIRS MINISTER

External Affairs Minister Dr. S. Jaishankar chuan nimin khan Singapore Prime Minister Lee Hsien Loong a kawm. He hunah hian hruaitu pahnihte hian Indo-Pacific leh West Asia inkara an ngaihdante an sawidun a. Dr. Jaishankar-a chuan India leh Singapore inkara inlaichinna nghet tak chuan a tha lam zawngin hma a sawn zel a ti a. Singapore Prime Minister-in khawvel thilthleng meka a ngaihdan a sawite chu India chuan a ngai pawimawh hle a ni a ti bawk.

Puan tawh angin Dr. Jaishankara hian ni thum cham turin Singapore a tlawh a. External Affairs Minister hian Singapore Foreign Minister Vivian Balakrishnan a kawm bawk a ni..

<><><>

EC TO CEO REGARDING HEATWAVE

Election Commission chuan state leh UT tina Chief Electoral Officer te chu khawlum zual zel thlir chunga hma la turin a thurawn a pe. EC sawidanin Meteorological Department chuan kumin nipuiah hian khua a lum zual dawn niin a tarlang a, March atanga June thla inkar chhunga khawlum hi tum dang aia nasa zawk tur niin a chhut lawk a ti a. Hei vang hian Election Commission chuan National Disaster Management Authority-in khaw lum lutuka tih tur leh tih loh tur kaihruaina a siamte state tin Chief Electoral Officer te a thawn tel bawk a. NDMA chuan khawlum niah chuan chhun dar 12 atanga tlai lam dar 3 inkarah chuan pawn nisaah tumah awm lo turin a thurawn a chhuah a. Tui tam tawk tak in tur anih thu leh ei leh in pawh fimkhur a tul thu a tarlang a. Election Commission pawhin Chief Electoral Officer te chu polling Station tinah tuisik in tur mamawh khawp chhawp ngei tur leh hmun daihlim ruahman turin a hriattir nghal bawk a ni.

<><><>